



Sarajevo, 20. januar 2017. godine

SAOPŠTENJE ZA MEDIJE

CSS UKAZUJE NA POTREBU USPOSTAVE PARLAMENTARNOG NADZORA NAD RADOM UPRAVE ZA INDIREKTNO OPOREZIVANJE BIH

Najnovija analiza Centra za sigurnosne studije pokazuje da postojećim zakonskim propisima i poslovnicima domova Parlamentarne skupštine BiH nije regulisan parlamentarni nadzor nad Upravom za indirektno oporezivanje BiH (UIO BiH), uprkos činjenici da ova bitna institucija sektora sigurnosti po normativnim i praktičnim principima potpada pod kategoriju tijela izvršne vlasti nad kojima je potrebno uspostaviti nadzor i kontrolu od strane zakonodavne vlasti. Kontrolna i korektivna uloga parlamenta u nadzoru rada UIO BiH neophodna je iz više razloga.

Ova institucija jedini je organ u BiH odgovoran za provedbu zakonskih propisa i politike indirektnog oporezivanja te za naplatu i raspodjelu prihoda od indirektnog oporezivanja. Uz to, UIO BiH vrši prikupljanje prihoda za budžete svih nivoa vlasti u BiH, a ujedno je i druga institucija s najvećim brojem uposlenika na državnom nivou. Carinske službe, kao bitan faktor funkcionisanja svake države, predstavljaju jednog od osnovnih aktera sektora sigurnosti. Također, UIO povjereni su poslovi koji zalaze u djelokrug rada istražnih organa u skladu sa odredbama Zakona o krivičnom postupku BiH i Zakona o UIO BiH. Interes građana za detaljnijim informacijama o radu UIO, koje se mogu ostvariti kvalitetnim parlamentarnim nadzorom, svakako je potaknut čestim medijskim izvještajima koji ukazuju na nepravilnosti u funkcionisanju UIO BiH.

S obzirom na ovlaštenja i odgovornost koju UIO BiH posjeduje u okviru datih nadležnosti te njen značaj za interese građana i države, predlažemo da se što prije razmotri uspostavljanje parlamentarnog nadzora nad radom Uprave, što bi u krajnjoj instanci doprinijelo povećanju transparentnosti i približavanju ovog segmenta rada široj javnosti.

Kompletnu analizu možete preuzeti na:

http://css.ba/wp-content/uploads/2016/11/Analiza_Zašto-parlament-ne-nadzire-UIO-BiH_CSS-2017.pdf

Dr. Denis Hadžović
generalni sekretar

